

# Feilixlbir Sul

## 1

### Zzasoso Dae Biex

<sup>1</sup> Ngo mel Barloxr a. Ngo nei Tixrmoxrtaexl ngua nnel mel Yisu Zidu leil visser su ca a. Feilixlbir zzi gga hher dae Arbosobo ddei cassor-worssor hherdder Yisu Zidu dax hher ji dae ca mel, halae jiaxlhuixl gga vaervaerpor nei miar guaxr su mel, ngua nnel nia leil xil vaexr gger. <sup>2</sup> Niul ddei Arbbor Arbosobo nei niul ddei Seirpor Yisu Zidu nia leil cirza-hanga seirseir mel meixl gger lol nia, nia leil nixmox zzaso lol nia.

### Barloxr Feilixlbir Zzi Gga Jiaxlhuixl Leil Arbosobo Dax Ddar Biar Gger

<sup>3</sup> Ngo nia leil ha holcir du lei a mel, ngo dder ngo ddei Arbosobo leil nawo. <sup>4-5</sup> Nia mel ngo nia leil Yisu Zidu leil biar dae ddar seirseir mel biar gger beil hal cir ni cirdae a, eilni zzezze lei ngo leil beijjiu a Yisu Zidu leil biar dae ddar seirseir mel ca leil biar gger ssi, yel ngo cirboxl-hanga nia leil Arbosobo dax qiuxr gger car lei, zoxlzoxl a ggegge-sese a qiuxr gger doxr dae. <sup>6</sup> Arbosobo mel nia leil gierbox beil su ddei nga a. Ngo saexl, yar nia leil nixmox zzar gierbox cirdae a, Yisu Zidu zeixleixr jjixr lei hal cir ni zzezze gierbox ci a, nia leil seirceix-seirmaer loxr lol.

<sup>7</sup> Ngo nixmox zzar nia leil holcir ji dae a, ngo nia leil eine perniar a mel hoxr arddeir a. Ngo loxrgier dae bbeixsael Yisu Zidu ddei ddar seirseir mel yarzi a ca dax zex zzorbbeixlei, Arbosobo niul leil seirseir meixl gger.

<sup>8</sup> Ngo nia leil yarzi sael jjiur. Ngo nia leil perniar a mel, Yisu Zidu nia leil perniar mel sael a perniar dae. Ngo bbeix dae mel mel yarzi a Arbosobo lei saexl.

<sup>9</sup> Ngo nia leil Arbosobo dax ddar biar gger: Ngo yar leil qie a nia leil ca leil nei Arbosobo leil perniar dax lol, yar leil saexl dax lol, yoxl ciryoxr-hanga lei ho bei ho saexl miur lol, <sup>10</sup> yel nia leil hoxr bbeixsael nr hoxr bbe kae var lol, Zidu jjixr lei hal cir ni ci a, nia leil seirceix-seirmaer botaddu lei nr zza nga lol, nia leil nixixl goxr a lei Yisu Zidu leil koxl dae a, <sup>11</sup> cirza-hanga seirseir mel bei ssi lol. Eine nga a mel ca mel Arbosobo leil yarzi sael middux lol nei yar leil bbeix zae gger var.

### Zidu Leil Weix A Gol Dae

<sup>12</sup> Arzzi-nimar arzzi-nimo mel, ngo nia leil saexl lol nia, ngo cirza-hanga nr seir eil mel pex dae a, Seirpor Yisu ddei ddar seirseir mel gielgiel biar kae a. <sup>13</sup> Yel ngo loxrgier dae car, loxrgier ggie meixr mel nei kebal ca maelmaerjjia lei ngo mel Zidu leil weix a loxrgier dae arddeir a saexl a. <sup>14</sup> Halae arzzi-nimar seirseil ar ke a lei ngo loxrgier dae a, yaa dder ho bei ho Seirpor Yisu leil ddarzzi dax a, yel arseir dax lei gexr nr saexl, Arbosobo ddei ddar mel ca leil biar gger ssi bel.

<sup>15</sup> Ca cirmelmel a Yisu leil biar dae ddar seirseir mel ca leil biar gger a mel, si leil nixnox nei si dax zex meixr a biar gger arnar a. Ca cirmelmel a nael, nixmox seir a biar gger arddeir a. <sup>16</sup> Nixmox seir a biar gger su ca hal mel mel, ngo loxrgier dae a mel Yisu leil biar dae ddar seirseir mel leil weix a si dax zex a nga arddeir a saexl. Yaa ngo leil perniar a, Yisu leil biar dae ddar seirseir mel ca leil biar gger ssi. <sup>17</sup> Nael nixnox a biar gger ssi su hal mel mel armael leil weix a biar arnar, Yisu leil weix biar nr nga. Yaa ngo loxrgier dae car leil jiux dae a ngo leil goxr sol lol niazzir. <sup>18-19</sup> Nael eine nga a lei azo ar ddei zzi bbeixleir? Ca mel Yisu leil biar dae ddar seirseir mel si leil biar gger ssi a, armael leil weix a biar gger ssi bbeixsael Yisu leil weix a biar gger ssi zzorbbeixlei, Yisu leil biar dae ddar seirseir mel biar kae lalssa, ngo dder ggese var.

Ngo saexl, nia ngo leil Arbosobo dax qiuxr gger dae nei Yisu Zidu ddei

Xiu ddei ngo leil beijjiu dae a mel, ngo leil piur teixl lei var. Yel ngo dder ggesse doxr dae. <sup>20</sup> Ngo nixmox zzar xiar dae nei ngo nga loxia dae ddei mel dder Arbosobo ngo leil miar gger mel ngo cirjji-hanga bei ssi a arseir dax lei yixrsixr nr zza ar jji nr zza, halae azo pex dae a lei ngo armael nixmox vaervaermo nga lol. Eine nga a si bbeixsael gol zzorbbeixlei, arddolcar lei ngo Zidu leil middux lol cexr. <sup>21</sup> Ngo leil bbeix ci a mel, ngo Zidu leil weix a gol dae arddeir a. Ngo si a gielgiel seir. <sup>22</sup> Ngo gol dae arddeirnga a, Yisu Zidu leil miar hanol bei gger cexr. Ngo lei gol bbeixsael si tiur nia nr saexl. <sup>23</sup> Yarzi tiur sol. Ngo middurbbor hher nia-nr-zzir, Zidu dax ssi niazzir. Eil ddei mel dder seir zzir ddei nga a. <sup>24</sup> Nael ngo nia leil beijjiu cexr a, nia leil weix a gol zei si a mel bir si leil seir leixl. <sup>25</sup> Ngo eine ddarzzi, yel ngo saexl, ngo nia leil weix a gol zei si var. Ngo nia dax cirgo a hher dae a mel, nia leil ho bei ho Yisu leil ddarzzi dax lol, ho bei ho yarzi sael ggesse lol. <sup>26</sup> Ngo loxrgier teixl lei a, nia dax lei car, nia gielgiel Yisu Zidu leil bbeix zae gger var.

<sup>27</sup> Nia camu-wormu a mel, Zidu leil biar dae ddar seirseir mel dax zox dae a zabbar seirseir a bei nia. Eine nga a mel, ngo nia leil i lei bbeixsael nr i lei zzorbbeixlei, nia nixmox zzar ciryoxr a xiar dae, cir piar a bei dae, Yisu leil vever a ddarzzi dae, Yisu leil biar dae ddar seirseir mel leil dir su ca mel leil bbiur gger doxr dae, <sup>28</sup> yaa nia leil azo lerler zux a lei nia nr gexr, ngo bbejjiur var. Yaa lei nia eine bei ggie mia a dder saexl, nia leil mel jiuxl wo ho a; yaa mel dixlyuxl gga hher nia. Eil mel hherdder Arbosobo bei dae mel nga a. <sup>29</sup> Ngo arsaenga a eine bbeix neil? Arbosobo nia leil Yisu Zidu leil ddarzzi lol lar nr nga a nei, halae nia leil yar leil weix a goxr sol lol. <sup>30</sup> Nia goxr sol dae mel hherdder halleix ngo goxr sol dae a nia mia goxr mel dax ciryoxr a nga. Halae eilleix ngo goxr sol dae a, nia bbejjiur mel dax ciryoxr a nga.

## 2

### Yisu Zidu Arsae Xiar Dae Mel Nia Lei Arsae Xiar Nia

<sup>1</sup> Nia mel Zidu dax hher ji dae a, nia nixmox zzaso; yar nia leil perniar a, nia leil nixmox dder vaer; nia Arbosobo ddei Xiu ddei dax toltor a bei; Zidu nia leil laxrtexr nei nia leil zoxlnixr. <sup>2</sup> Yel nia dder nixmox zzar zzi dax ciryoxt a xiar ji dae nia, zzi leil perniar nia, zzi dax toltor a nga nia. Eine nga a dder ngo leil nixmox zzar yarzi sael ggese lol. <sup>3</sup> Nia azo bei lei armael leil lar weix nr ddo, middux nia tuxr nr ddo, col nr ddo, si bir armael leil zoxlyoxl eine zzir nia. <sup>4</sup> Nia ca cirddeir-hanga lei armael ddei lar gux nr ddo, si ddei seirggiebbær lei xiar nia.

<sup>5</sup> Yisu Zidu arsae xiar dae mel, nia lei arsae xiar nia:

<sup>6</sup> Yar mel cirza-hanga lei Arbosobo dax ciryoxt a nga bbeixarnar, nael yar Arbosobo sael a quexrlixl zza nia, nr ze.

<sup>7</sup> Yar cirza-hanga lei nr li, zebol sael a loxr a; yar ca loxr a, ca ggecir ar ddei zza.

<sup>8</sup> Yar cirdoxr lei nr col, si lozzezze lei Arbosobo ddei ddar no a, sixrzixljiaxl leil si a.

<sup>9</sup> Yel Arbosobo dder yar leil hazza-hamaer leil lei vaer leixl lol ho a; quexrlixl zza zzir lol ho a; middux zzir lol ho a;

<sup>10</sup> merlabbor hher dae, middurbbor hher dae, middur zzar hher ji dae hazza-hamaer leil lei, yar ddei mi ddei leil bbejjiur a dder cizixl gger lol,

<sup>11</sup> meir niar dae hazza leil lei Yisu Zidu mel Seirpor a cexrssexl lol. Eine nga a mel dder arseir lei Yarbbor Arbosobo leil middux lol.

### Yisu Leil Ddarzzi Su Mel Arsae Bei Nia

<sup>12</sup> Eine nga a, ngo perniar dae arzzi-nimar, arzzi-nimo mel, ngo nia dax cirgo a hher dae car a lei, nia mel zoxlzoxl a ngo bbeix dae Arbosobo ddei ddar mel leil noni dae, eilboxl ngo nia dax cirgo a nr hher a gielgiel noni nia. Arbosobo nia leil jiuxl ho a, yar nia leil bei lol mel, nia yar leil i du, yar leil gexr a bei jjia nia. <sup>13</sup> Eil ddei mel Arbosobo nia nixmox zzar hher dae a, nia leil beijjiu a, yar xiar ji dae yarzi seir hal mel bei ssi yuex lol, halae nia leil bei bbesur zza lol a nga arddeir a.

<sup>14</sup> Nia azo bei lei boxyox nr ddo, si dax zex nr ddo. <sup>15</sup> Eine nga a mel, nia botaddu lei nr zza, nr seir cirdoxr lei nr xiar, Arbosobo ddei ssormine seirceix-seirmaer ca hal mel bei cexr. Nia middurbbor yarzi gexrddo, zuixl yarzi neixl ca mel dax hher dae a mel, hherdder eilmerxixl gie mel merlabbor bbo dae sael a nga. <sup>16</sup> Nia Yisu leil biar dae ddar seirseir mel ca mel leil biar gger a, yaa leil Yisu dax cirgo a goxr dae cexr lol a mel, ngo miar bei dae mel baexr a sulku nr nga a; hherdder ngo jjiumo beix a baexr a beix dae nr nga sael a nga. Yel Zidu jjixr lei hal cir ni ci a, ngo dder nia leil kuar ddu zza a. <sup>17</sup> Nia Arbosobo leil ddarzzi a yar leil weix a gol dae a mel, hherdder zilabox sser a Arbosobo leil zi dae sael a nga. Ciryoxr a nga, ca mel ngo leil seixl a ngo ddei sirnilni mel Arbosobo leil zilabox puxrto zzibbaer sael a nga. Nia goxr sol var nei ngo olga pixl var bbeixarnar, ngo halae ggese. <sup>18</sup> Nia lei ngo dax cirgo a ggese nia.

### **Barloxr Tixrmoxrtaexl Leil Kuar Gger**

<sup>19</sup> Ngo Seirpor Yisu leil koxl dae a, nialngasael Tixrmoxrtaexl leil zi a nia dax ssi lol niazzir. Yel yar nia arsaesael nga dae ngo leil saexl lol a mel, ngo nixmox zzar dder zzaso a. <sup>20-21</sup> Ca cirddeir-hanga lei armael ddei lar xiar, yaa Yisu Zidu ddei miar mel leil lei nr guaxr. Yel ngo dax eilmaex gga ca mel arseir lei Tixrmoxrtaexl sael a nia leil einezeixl perniar su nr zza. <sup>22</sup> Tixrmoxrtaexl ca eil ddei arsaesael nga mel nia lei saexl. Yar mel ngo leil yarzi beijjiu guaxrzoxr. Ngua nnel mel arbbor

ssor nr bollor sael a nga, ngua Yisu leil biar dae ddar seirseir mel leil weix a cirgo a miar bei. <sup>23</sup> Yel ngo armael arsae nga var saexl a dder nialngasael Tixrmoxrtaexl leil zi a nia leil i ssi lol niazzir. <sup>24</sup> Halae ngo ddarzzi, hormo arleixr nr nga dder Seirpor ngo leil nia leil i lei lol var.

<sup>25</sup> Nael ngo zzir dae a, arsaebeilei niul ddei arzzi-nimar Yirbafuxrtixr leil miardal a, nia dax halmaex gga jjixr lol nia. Yar mel ngo dax cirgo a miar bei carbeix a. Ngua nnel mel Zidu ddei meixr mu su mel sael a nga. Yar mel nia yar leil miardal a, ngo leil beijjiu lei lol arddeir a. <sup>26</sup> Yar nia cirddeir-hanga leil lei yarzi jjiur, nia yar no goxr a bbejjiur a gielgiel yar nixmox zzar yarzi zzasol, yel ngo yar leil nia dax halmaex gga ssi lol nia. <sup>27</sup> Yar yarzi no goxr a; zeixleixr nr nga lei si a; nael Arbosobo yar leil zoxlnixr a, yar leil kor lol a. Arbosobo yar leil lar zoxlnixr nr nga a nei, ngo leil lei zoxlnixr, ngo leil cix zil nrsulsul nr cix lol. <sup>28</sup> Yel ngo gielgiel nialngasael yar leil miardal a, nia dax halmaex gga jjixr lol niazzir. Eine nga a mel, nia yar leil mia a dder ggese var, ngo lei einezeixl cix nr ssa a. <sup>29-30</sup> Nia ngo leil beijjiu ci nr ddo hal mel yar ngo leil beijjiu. Yar Zidu ddei miar mel leil weix a, olga ddei lei nr li, zeixleixr nr nga a lei si a. Yel nia ggegge-sese a kebal Yisu leil ddarzzi su mel leil hexl mel sael a yar leil hexl nia, halae yar sael a ca eil mel leil i du nia.

### 3

#### Yisu Leil Ddarzzi Su Mel Arbosobo Yaa Leil Zuixl Nr Zza I Mal Gger

<sup>1</sup> Arzzi-nimar arzzi-nimo mel, ngo halae nia dax ddar biar nr jjia seir. Nia Seirpor Yisu dax hher ji dae a, yel nia ggese nia. Ngo nia leil vaexr gger goxr ddar eil mel ngo zeixleixr nia leil vaexr gger a mel, nia leil Seirpor Yisu leil vever a ddarzzi doxr dae lol var, yel ngo maxrfaxr nr zzir.

<sup>2</sup> Nr seir bei su ca hal mel mel, anol sael a nga. Yaa gelir<sup>a</sup> bei a mel, altor sser a ca ggecir leil caer, yel nia yaa leil fadae nia.<sup>b</sup> <sup>3</sup> Niul gelir bei a mel Arbosobo ddei Xiu ddei leil koxl dae a Arbosobo leil zi, yar leil bbeix zae gger. Niul ddei kuar ddu ddei mel dder Yisu Zidu nga a. Arbosobo niul leil jiuxl a mel, niul leiddur bei goxr mel leil koxl dae nr nga. Yel yarzi gelir bei su ca mel hherdder niul nga a.<sup>c</sup> <sup>4</sup> Arseir yar ggecir leil leiddur bei goxr mel leil koxl dae a, Arbosobo yar leil jiuxl var eine zzir dae arddeirnga a, ngo gielgiel koxl dae cexr.

<sup>5</sup> Ngo leil mel xiu teixl lei heixl ni dder gelir bei gger a; ngo xiu teixl lei a dder Yirsaexllixl goxrjia gga su ca a; ngo ddei porpor mel Bixlyarmir a; ngo leil mel Xiboxrlaexr su xiu a, yel ngo yarzi Xiboxrlaexr su ca a.<sup>d</sup> Ngo Farlixlsaexl su ca mel dax cir piar a nga, yel Moxrxi vaexr ddei Lixlfaxr ddei dax zabbar seirseir a bei mae dae. <sup>6</sup> Ngo mel yarzi sael Arbosobo leil visser niazzir a, yel ngo Yisu leil ddarzzi su ca mel leil bixr goxr a. Moxrxi vaexr dae Lixlfaxr dax zabbar seirseir a bei mae dae a dder Arbosobo ngo leil jiuxl var arddeirnga a, ngo leil mel botaddu cirdoxr lei nr zza.

<sup>7</sup> Nael ngo Zidu leil ddarzzi ho a, halleix ngo zzir dae a ngo leil yarzi seir hal mel, eilboxl ngo dax seirggiebbær cirdoxr lei nr zza a. <sup>8</sup> Eine lar nr nga a nei, ngo zzir dae a ngo ddei Seirpor Yisu Zidu leil saexl a mel

---

<sup>a</sup>**3:2** *gelir* Gelir bei a mel dder capor ddei sirbeixl dder olniuxniux zzi ddei caer teixl gger.

<sup>b</sup>**3:2** Ca eil mel bbeix gelir bei a saelnei jiuxl wo ddo, yel Barloxr yaa leil bota.

<sup>c</sup>**3:3** Loxrmar Sul 2:25-30 leil biar dae.

<sup>d</sup>**3:5** *ngo leil mel Xiboxrlaexr su xiu a, yel ngo yarzi Xiboxrlaexr su ca a.* Yilsi mel dder yar leil Yirsaexllixl goxrjia gga xiu teixl lei, yar Xiboxrlaexr ddar te.

dder naxrcixl zzir ddei nga a. Yel cirza-hanga lei ngo dax seirggiebbær cirdoxr lei nr zza ho a. Ngo Yisu Zidu leil weix a cirza-hanga lei nr li, cirbelde sael a i mal gger ho a. Ngo eine bei a mel Zidu dax cir hhexr a loxr<sup>9</sup> nei yar dax nixmox cir taex a loxr niazzir a nga arddeir a. Arbosobo ngo leil zuixl nr zza ca i mal gger a mel, ngo Lixlfaxr dax bei mae dae nr nga a nei, ngo Zidu leil ddarzzi a nga arddeir a.<sup>10</sup> Ngo yar leil saexl niazzir, Arbosobo ddoddomo bei a yar leil gol du xixl lei lol eil mel leil saexl niazzir, yar sael a goxr sol yar sael a si yuex.<sup>11</sup> Eine nga a mel, arsae nga zzorbbeixlei, ngo si a, gol du xixl lei cexr.

### Yisu Leil Velve A Ddarzzi Doxr Dae

<sup>12</sup> Ngo eine bbeix a mel, ngo bbeix dae hal mel li wo ho a bbeixsael seirceix-seirmaer loxr a bbeix nr nga. Ngo halae li nr wo seir. Ngo zabbar seilseir a Zidu dax bei mae ze si a seirceix-seirmaer loxr niazzir. Yisu Zidu ngo leil jiuxl a mel, hherdder eine nga lol niazzir a nga arddeir a.<sup>13</sup> Arzzi-nimar arzzi-nimo mel, ngo li wo labox hal mel ngo li wo ho a ngo eine nr zzir. Eilcar ngo zabbar seilseir a miar cir yoxr a bei niazzir: hherdder goxr jixr ho mel hol-nr-cir yar leil goxr jixr lol a, zabbar seilseir a ngo goxr nr ci seir hal mel xiar ssi.<sup>e 14</sup> Ngo ho bei ho Zidu dax bei mae doxr dae a si lol zzeze bei ci a, Arbosobo ngo leil gger ddei li wo niazzir. Arbosobo ngo leil gger ddei mel dder Yisu Zidu ngo leil weix a si a ngo leil yar dax merhhexr gga hher lol.

<sup>15</sup> Yel niul ca mel gga Yisu Zidu dax bei mae dae gaxzi su ca hazza mel dder eil mel sael a xiar nia. Nia nixmox zzar ciryoxr a nr xiar dae arddeirnga a lei, Arbosobo nia leil arseir xiar dae mel hoxr saexl lol var.

---

<sup>e</sup>**3:13** *hherdder goxr jixr ho mel hol-nr-cir yar leil goxr jixr lol a, zabbar seilseir a ngo goxr nr ci seir hal mel xiar ssi. Yar mel beix birvul su ca sael a nga. Yar giedae piar a gga nr i, xilmeir bbaer lar i.*



<sup>16</sup> Nael arsae nga zzorbbeixlei, niul halae halleix Yisu Zidu niul leil bei lol hal mel sael a bei ze si nia.

<sup>17</sup> Arzzi-nimar arzzi-nimo mel, nia ngo dax ciryoxr a bei nia. Nia lei ngua dax bei mae dae su ca hal mel dax zza nia. <sup>18</sup> Arsaenga a ngo eine bbeix neil? Ngo eine bbeix a mel ca cirke a ngua ca leil biar gger dae mel leil dir su loxr ho a bbeix arddeir a. Ngua biar gger dae mel mel hherdder Zidu mel sixrzixljiaxl leil si a, yar leil ddarzzi su ca mel leil jiuxl. Eil ddei mel ngo nia leil hormo boxl nei biar gger goxr ho a; nael eilcar ngo yoxl meixbbix ddux dae a zeixleixr nia leil biar gger. <sup>19</sup> Zidu leil dir su eil mel ddei Arbosobo ddei mel hherdder yaa armael ddei xilbe taex nga a. Yaa mel yarzi seixldaddo hal mel bei, nael yaa zzir dae a yarzi middarzza; yaa middurbbor ddei cirza-hanga mel leil lar xiar; yel yaa dixlyuxl gga hher nia. <sup>20</sup> Nael niul mel Merhhexr ddei goxr ddei gga cassor-worssor mel a. Halae niul mel niul leil jiuxlsu Seirpor Yisu Zidu leil xia dae a merlabbor cirdae a middurbbor ze lei. <sup>21</sup> Yar mel yarzi ddo, hazza-hamaer leil lei yar ddei ddar no lol. Yar ddoddomo bei a, niul si var ggecir ddei gierbox gger nia; yel niul leil yar sael a bbobbolbbo zza ggecir ar ddei gger box.

## 4

<sup>1</sup> Arzzi-nimar arzzi-nimo mel, ngo nia leil perniar, nia leil jjiur. Ngo ddei ggeseddu mel dder nia nga a; nia mel dder ngo oldde leil ddexrlabox yarzi naxrcixl hal ddei sael a nga. Ngo perniar dae ca mel nia ngo nia leil mul gger dae mel dax zox dae a zabbar seilseir a Seirpor Yisu leil ddarzzi ze si nia.

### **Barloxr Yisu Leil Ddarzzi Su Mel Leil Quex**

<sup>2</sup> Ngo ddei arzzi-nimo Yor'adi nei Xuexrduzi, ngo nia nnel leil quex, nia Seirpor Yisu dax hher ji dae a, zzi dax toltor a bei nia. <sup>3</sup> Ngo lei ngo dax

cirgo a lorleix bil su ddei leil qiuxr, ni ssormaer eil nnel leil beijjiu nia. Halleix yaa nnel mel Seirpor Yisu leil biar dae ddar seirseir mel leil weix a, ngo nei Gerlilmir halae yoxl kebal arzzi-nimar arzzi-nimo mel dax cirgo a sulku. Yaa ddei mi mel lei Arbosobo mi guax dae sul hal ber leil guax deix dae ho a. Sul hal ber mel dder cirse-cirsil lei olga zza su ca mel ddei mi guax deix dae ber nga a.<sup>f</sup>

<sup>4</sup> Nia Seirpor Yisu dax hher ji dae a, arddolcar lei ggeese nia. Ngo zeixleixr nia leil ar boxl bbeix, nia ggeese nia! <sup>5</sup> Nia ca mel leil nia arseir dax lei bei tor ddo saexl lol nia. Hormo arleixr nr ssa mel, Seirpor Yisu dder jjixr lei du a. <sup>6</sup> Nia cirza lei zoxrzixr nr ssa, nia sser zoxr maelmaerjjia Arbosobo leil bbeix gger nia. Nia bbeix gger car, yar dax ddar biar, yar dax qiuxr, yar leil nawo. <sup>7</sup> Eine nga a mel, Arbosobo nia leil nixmox zzar xiar lei xiar nr ci zzaso lol var. Arbosobo nia leil eine zzaso lol a mel, nia Yisu Zidu dax hher ji dae a nga arddeir a. Arbosobo nia leil nixmox zzar zzaso lol a mel, nia dder zoxrzixr nr var, gexr nr var.

<sup>8</sup> Arzzi-nimar arzzi-nimo mel ngo halae ddar bbeix nr jjia seir. Ngazi hal mel, i du ddo hal mel, hoxrhoxr hal mel, zuixl nr zza hal mel, perniar saerddo hal mel, mixrcixl yarzi seir hal mel, Arbosobo i dae a seir hal mel, halae arseir lei kuar gger saerddo hal mel mel, nia zoxlzoxl a nixmox zzar xiar ji dae nia. <sup>9</sup> Nia mel nia ngo dax zza wo, ngo dax li wo, ngo dax bbejjiur wo, ngo dax i wo hal mel sael a bei ssi nia. Eine nga a mel, ca leil nixmox zzaso lol su Arbosobo ddei dder nia dax cirgo a hher dae a.

### **Barloxr Feilixlbir Zzi Gga Jiaxlhuixl Gga Ca Mel Leil Nawo**

<sup>10</sup> Nia mel halleix tortor lei ngo leil perniar. Cirdaedae a niul cirgo a nr hher dae a nia ngo leil perniar nr cexr, nael eilboxl nia yoxl ngo leil

---

<sup>f</sup>4:3 Qirsixlluxl Sul 3:5 Arbosobo mi guax dae sul ber leil biar dae.

perniar du xixl lei a; yel ngo Seirpor Yisu leil bbeix zae gger. Ngo yarzi sael ggese. <sup>11</sup> Ngo ddar eil mel bbeix a mel, ngo azo lerler sserddu nr zza a bbeix nr nga. Zzaegu miur bbeixsael nganiul lei ngo nixloxdda, ngo goxr zzawo ho a. <sup>12</sup> Casolssor nixixl goxr a, arsae goxr lei ngo saexl. Cabessor nixixl goxr a, arsae goxr lei ngo saexl. Zzor bbox dae bbeixsael meixr dae, cirza-hanga lei sser jjia nr ddo bbeixsael sser loxr nr ddo, eil mel maelmaerjjia lei arsae goxr mel ngo saexl ho a. Ngo mel dder arddolcar lei eine goxr si lei. <sup>13</sup> Zidu ngo leil bbesur zza lol a, ngo yar leil koxl dae a, bei nr cexr ar yoxr nr zza.

<sup>14</sup> Nael ngo yarzi goxr sol halcar a, nia ngo leil beijjiu a, ngo nia leil nawo a. <sup>15</sup> Nia Feilixl bir zzi gga ca mel lei saexl, ngo Yisu leil biar dae ddar seirseir mel nia leil biar gger ssi beil a, ngo Marcixrduixl mermi nr hher halcar a mel, nia jiaxlhuixl ddei lar ngo leil beijjiu a, ngo sser zoxr mel ngo leil gger. Kebal beijjiu su nr zza. <sup>16</sup> Tisarloxrnixrjia zzi gga hher dae car lei, nia ca leil zae nr boxl sael miardal si lei a, ngo sser zoxr mel ngo leil gger. <sup>17</sup> Ngo ddar eil mel bbeix a mel nia leil ngo leil arddolyox gger loxia a bbeix nr nga. Ngo nia leil ho bei ho seirseir bei miur lol, Arbosobo leil nia leil seir lol niazzir a bbeix arddeir a. <sup>18</sup> Nia Yirbafuxrtixr leil miardal a, ngo leil zzeilixl-zzeilor gger dae hal mel ho mal gger lei lol. Nia ho mal gger lei mel mel ngo sser zoxr mel leil lei miur leixl a. Nia ngo leil cirza-hanga eil mel gger a mel, hherdder xiuzixzixmo Arbosobo leil ziddu hal mel Arbosobo leil zi dae sael a nga. Arbosobo nia yar leil zi dae eil mel leil yarzi sael lizoxr. <sup>19</sup> Ngo ddei Arbosobo ddei mel cirza-hanga seirseir mel sser lei sser jjia nr ddo zza. Yisu Zidu nia leil weix a si a, yel nia sser zoxr cirza-hanga lei Arbosobo nia leil zzeilixl-zzeilor gger var.

<sup>20</sup> Niul ddei Arbbor Arbosobo leil cirse-cirsil lei middux lol nia. Amae!

**Barloxr Feilixl bir Su Ca Mel Leil Seir Lol**

<sup>21</sup> Ngo nia leil qie, nia Arbosobo ddei cassor-worssor, hherdder Yisu Zidu leil ddarzzi su ca maelmaerjjia leil zzasoso dae arleixr biex gger ssi. Ngo dax cirgo a hher dae arzzi-nimar mel lei nia leil zzasoso dae biex dae. <sup>22</sup> Arbosobo ddei cassor-worssor maelmaerjjia lei nia leil zzasoso dae biex dae. Loxrmar goxrjia zzirmar hher ggie arzzi-nimar arzzi-nimo mel gielgiel nia leil zzasoso dae biex dae.

<sup>23</sup> Seirpor Yisu Zidu nia leil cirza-hanga seirseir mel meixl gger lol nia. Amae!